

## Die sparn omm falsche Fleck

Omm Ostersunndaachowend klingelts Telefon unn die Paula war droo.

Scheene Ostern, hottse gesaat, Honnes, mir wollte doch moie nooch emm Esse e bis-si spaziergeh. Doo werdd nix draus, de Karl der hott joo so de Husde, der soll emol im Haus bleiwe unn warme Äppelwoi drinke. Seid uns nit bees, awwer ess nächsde Mol sinn merr widder debei.

Scheene Ostern, habb ich ze Antwort gewwe. Awwer grad habb ich de Wedderbericht im Radio geheert, ess soll om Ostermondaachmiddaach sowieso Reeche unn Schnee gewwe, doo bleiwe merr lieber aach dehoom. Dann ruf ich aach grad ess Kättche unn de Schorsch oo unn saach dene ab – odder host du dess schunn gemacht?

Naa, hott die Paula gesaat, awwer ich wollts Kättche sowieso oorufe, dann saach ich halt, dass ich mett eich schunn geschwätzt habb unn dass merr erst dann widder enaus gehe, wens Wedder besser werdd.

Iss gut, habb ich gesaat, dann saach dene zwaa enn scheene Gruß von uns. Also machs ...

Halt, hott die Paula ins Telefon gerufe, halt, ich habb noch was. Saach emol, ihr habt eich neilich om Stommdisch iwvers Geld unnerhalle unn dass mir Rentner immer wenicher defoo im Säckel hawwe. Stimmt dess, dassde gesaacht host, dass uns Alde nit kaputt kriehe dete unn wenn mir nor noch Quellkadoffele esse unn Schwefelwasser drinke dete?

Naa, saach ich, dess hott doin Karl gesaat, awwer mir hawwem Recht gewwe. Waaßde, mir hawwe als Kinner im Weltkriech gelernt, dass merr aach mett wenich auskumme kann, unn weil merr dess gelernt hawwe, werdd uns dess was zwar ebbes ausmache wens so kimmt, awwer uffhänge dun merr uns desdeweeche nit.

Du Honnes, moont die Paula, ich habb merr doodriwwer mol Gedonke gemacht. Eichtlich mache die in Berlin enn gonz große Fehler, wenn die uns so wenich Rente gewwe.

So?, frooch ich, unn warum moonsde dass dess so wär?

Ja, sacht die Paula, grad weeche dene Quellkadoffele unn dem Schwefelwasser. Unn dass merr nimmi so vill Auto fahrn unn die Heizung erunnerdrehe. Was kimmt dann doodebei eraus? Mir Alde gehn owends frieher ins Bett, daachsiwwer laafe merr mehr, fahrn mehr Fahrrad unn esse nimmi so vill Worsch und Fleisch. Mir lewe also gesünder unn werrn doodebei als fitter statt fetter. Unn dann? – no was iss dann, Honnes?

Ich wusst nit wasse wollt unn habb nor gesaat: Was iss dann, Paula?

Doo sächtse: Honnes, wenn mir Alde als fitter werrn, dann lewe mir alls noch länger. Unn desdeweeche mache die in Berlin enn Fehler. Dess Geld wasse heit sparn, misese dann ausgewwe, wenn mir allminonner zeh Jahr länger lewe. Die sparn omm falsche Fleck. Dedese uns mehr Geld gewwe, dete mir fetter esse, dete owends in de warm Stubb länger uff de Couch sitze unn Erdniss futtern, dete alls mettem Audo fahrn unn dete alls mehr zunemme. Unn statt hunnert dete mir all nor neunzich Jahr alt werrn, dann detese enn Haufe Geld onn de Rente sparn, odder?

Mensch Paula, saach ich, doo iss noch kooner druffkumme. Awwer dess bleibt alles unner uns, gell?

ebb\_201\_552562765\_371491641.doc

Eiern Honnes